

	REGOLAMENT DAI LAVÔRS DE ASSEMBLEE DE SOCIETÂT FILOLOGJICHE FURLANE
	ART. 1 – OBIETÎFS E FINALITÂTS
	1. Chest regolament al à l’obietîf di regolâ il davuelzisi des voris de assemblee e lis relativis operations in osservance des normis dal Statût.
	ART. 2 – CONVOCAZION DE ASSEMBLEE DAI SOCIS
	1. Inte letare di convocazion, scrite e mandade daûr dal Statût, e varà di jessi indicade, in plui dal lûc li che si davuelç la Assemblee in presince, la pussibilitât eventûâl di partecipâ cun intervent a distance a mieç di struments telematics o che, dut câs, a permetin la visualizazion e la interazion a distance. 2. In chest câs, inte letare di convocazion, a varan di jessi indicadis lis modalitâts operativis pe partecipazion a distance o ben la risierve di comunicâ par timp la indicazion di cheste modalitât, salacor ancje midiant il riclam al sît internet de Societât o ben midiant l’acès a pagjinis dedicadis sul stes sît. 3. Su delibare dal Uffici di Presidence, si podarà previodi la partecipazion in presince in lûcs logâts dapardut e colegâts, midiant di mieçs che a permetin la visualizazion e la interazion, cul lûc li che si davuelç la Assemblee, di cumò indevant clamâts ancje “sedis assembleârs distacadis” come scrit in detai plui sot.
	ART. 3 – OPERAZIONS PRELIMINÂRS AE ASSEMBLEE
	1. Su delibere dal Uffici di Presidence, si podarà domandâ la prenotazion preventive de partecipazion in presince o a distance e chest sedi par permeti la verifiche de legitimazion ae partecipazion, sedi par previodi un flus dai participants in sigurece o par inmaneâ i colegaments adats in diviersis salis o sedis assembleârs distacadis. 2. In chest câs, inte letare di convocazion a varan di jessi indicadis lis modalitâts operativis par prenotâ la partecipazion.
	ART. 4 – SEDIS ASSEMBLEÂRS DISTACADIS
	1. La partecipazion ae Assemblee in presince e je ritignude e previodude tant che modalitât ordenarie e preferibil di partecipazion, stant che chest al è il moment plui significatîf de vite associative. 2. L’Uffici di Presidence, cun chê di sburtâ la partecipazion dal numar plui grant pussibil di socis aes voris assembleârs, al podarà previodi la pussibilitât di partecipâ ae Assemblee in presince intune sede distacade o intun altri lûc determinât, clamât “Sede assembleâr distacade”, colegât in timp reâl cul lûc li che si davuelç la Assemblee. 3. Il colegament jenfri la sede principâl e la sede distacade al varà dut câs di garantî la complete interazion cun pussibilitât di intervent e visualizazion l’un cul altri; a garantî il davuelzisi regolâr des voris inte sede assembleâr distacade al sarà un component dal Uffici di Presidence o ben un altri soci nomenât dal President, prin che a tachin i lavôrs de Assemblee. 4. La partecipazion intune sede assembleâr distacade e ven considerade tant che partecipazion in presince e duncje il soci al à la pussibilitât di jessi delegât, daûr dal Statût.
	ART. 5 – PARTECIPAZION AE ASSEMBLEE MIDIANT COLEGAMENT A DISTANCE DAL SOCI SINGUL
	1. Tal câs che e sedi previodude la partecipazion ae Assemblee midiant l’intervent di un soci a distance, chest al varà di verificâsi in maniere di permeti la identificazion dal soci intervignût cun pussibilitât di interazion cence limitazions di nissun gjenar e cu la modalitât video simpri in funzion dilunc di dut il timp de Assemblee, ancje par permeti illa conte des presincis.

	2. In plui e je ametude la partecipazion al massim di trê socis midiant di un sôl colegament a distance, simpri che la identificazion e la interazion a sedin pussibilis in ogni moment.
	ART. 6 – COMISSION VERIFICHE PODÊS
	1. Prin che a tachin lis voris assembleârs il President, se lu riten necessari, al pues proponi ae Assemblee la nomine di une Comission di verifiche dai podês, componude di un minim di trê a un massim di cinc sogjets, che a àn di jessi socis de Societât; cheste Comission e à la finalitât di fâ la verifiche de sussistence efetive dal drit di partecipazion e di vôt in cjâf ai presints. 2. In câs di votazions a scrutini segret o dut câs di elezion o nomine di membrs di orghins diretîfs o di control, la nomine de Comission e sarà obligatorie e e fasarà ancje la funzion di Comission eletorâl davuelzint lis operations di scrutini e dut il necessari. Intal so interni la Comission e elei un President propri. 3. L'esit des operations di verifiche de Comission al varà di jessi trasmetût al President prin che a tachin lis votazions.
	ART. 7 – PARTECIPAZION AE ASSEMBLEE DI SOGJETS TIERÇS E DELEGHIS
	1. A discrezion dal President, a puedin jessi invidâts a fâ presince in Assemblee altris sogjets, ancje no socis; chescj sogjets a varan la pussibilitât di intervignî a discrezion esclusive dal President de Assemblee e in nissun câs no podaran partecipâ a eventuâls operations di vôt. 2. Ai sens dal Statût lis deleghis a podaran jessi assegnadis dome ai socis che a intervegnin in presince; la partecipazion in presince intune sede assembleâr distacade e je considerade tant che davuelte in presince.
	ART. 8 – DAVUELZIMENT E DIREZION DAI LAVÔRS ASSEMBLEÂRS
	1. Une volte verificate la presince dal numar legâl, il President al declare vierte la sentade. 2. Il President al dirêç e al modere la discussion, al fâs rispietâ chest Regolament, al dâ la peraule tal ordin che e je stade domandade. Di regule nissun soci nol podarà vê la peraule sul stes argument plui di dôs voltis. 3. Une volte otignude la peraule, il soci al à di fevelâ dome de propueste in esam, in maniere che si conven curte e sute, gjavant il câs che la Assemblee e à facoltât di decidi un limit di timp pai varis intervents. 4. Tal câs che nissun soci nol domandi di fevelâ sul argument in esam, il President al declare sierade la discussion gjenerâl. Daspò no si pues plui dâ la peraule se no par semplicis declarazions di vôt. Il timp par cheste declarazion nol podarà superâ i trê minûts.
	ART. 9 – VERBALIZAZION
	1. Il verbâl de Assemblee lu scrîf in forme strucade e sintetiche il Segretari o un altri sogjet indicât dal President. A podaran jessi zontadis al verbâl declarazions scritis, baste che a sedin stadis letis in Assemblee di bande di cui che al à fat l'intervent.
	ART. 10 – VOTAZIONS
	1. Lis votazions a puedin jessi palesis o segretis. La votazion palese par solit e je par alçade di man. La votazion par apel nominâl e ven fate se lu domande in maniere esplicite almancul un tierç dai socis presints. Il vôt par alçade di man al è sogjet a cuintriprove, se cualchidun lu domande prime de proclamazion. 2. La votazion segrete si davuelç cun schedis e si le fâs in câs di elezion o nomine di personis a incarghis o ben se lu domande la maiorance assolude dai participants ae Assemblee, tal câs che si lu ritegni necessari.
	ART. 11 – ASSEMBLEIS ELETIVIS
	1. Pe elezion dai components dal Uffici di Presidence, dal Consei gjenerâl, dal Coleç dai Probivîrs e pe nomine dai membrs dal Coleç dai revisôrs dai conts, l'Uffici di Presidence di prin o ben un grup di almancul cincuant socis, al varà di depositâ li

	de sede de Societât filologjiche furlane almancul siet dîs prin de date che si da dongje la Assemblee, une liste alfabetiche di nons no inferiôr al numar minim e no superiôr al numar massim, dai components di ogni orghin di elei o nomenâ. 2. L'Ufici di Presidence al viodarà di predisponi lis schedis eletorâls cun dentri i nons indicâts tes listis depositadis previodint avonde spazi dulà podê scrivi nons alternatîfs a di chei proponûts. 3. In ogni câs fin a che no si declarin viertis lis operations di vôt, ogni soci al podarà declarâ la sô candidature aes incarghis sociâls, tal plen rispiet des normis dal Statût. 4. Prin che a tachin lis operations di vôt, la Assemblee e varà di deliberâ il numar dai components dal Ufici di Presidence e dal Consei gjenerâl, dentri dai limits minimis e massims previodûts dal Statût. 5. Lis modalitâts di elezion a saran indicadis inte schede eletorâl che e ven dade fûr par cure de Societât; lis schedis che a varan dentri un numar di components plui alt rispiet al numar di chei che si puedin elei, ancje cun riferiment a un orghin sôl, a saran anuladis, biel che a saran ritignudis validis lis schedis cun dentri un numar di nons inferiôr rispiet al massim di podê elei. 6. A risultaran elets chei che a varan ricevût il numar plui alt di vôts; a paritât di vôts al ven elet il plui grant di etât.
	ART. 12 – PROCLAMAZION DAI ELETs
	1. Il President de Assemblee, dopo vê ricevude la relazion dal President de Comission eletorâl, al proclame i elets. 2. Il soci elet o nomenât dentri di un orghin sociâl al podarà trasmeti une declarazion formâl di rinunzie no plui tart de prime riunion dal stes orghin; in chest câs al jentrarà tal so puest il prin dai no elets.